

दिनांक 18.10.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- वित्त मंत्री निर्मला सीतारामन कह्यो-जीएसटी सुधारों के त्रैहारां रा दिनां मांय इलेक्ट्रॉनिक्स, ऑटोमोबाइल अर उपभोक्ता सामान रा हलकां मांय रिर्कोर्ड बिक्री व्ही।
- मुख्यमंत्री भजन लाल शर्मा किसानां रा मान ने सब के मोटो मान बतायो -करीब 72 लाख किसानां रा खातां मांय 718 करोड़ रुपया डीबीटी रे जरिये भेज्या।
- अंता उपचुनाव सारू भाजपा रा उम्मीदवार मोरपाल सुमन पर्चो दाखिल कीनो-हाल ताई 12 उम्मीदवार 17 नामपाना दाखिल कीना।
- धनतेरस सागे आज दीवाळी रो त्रैहारा सारू व्हयो-मोटी तादाद मांय लोग खरीददारी सारू पूग्या- मिन्दरां मांय दीपदान।

000

वित्त मंत्री निर्मला सीतारामन कह्यो है के जीएसटी 2.0 सुधारों के त्रैहारां रे मौके इलेक्ट्रॉनिक सामान, मोटर गाड़ियां अर रोजीना काम आवण वाळा सामान सरीखा खास हलकां मांय रिर्कोर्ड बिक्री व्ही है। वे आज नई दिल्ली मांय सूचना अर प्रसारण मंत्री अश्विनी वैष्णव अर वाणिज्य अर उद्योग मंत्री पीयूष गोयल सागे जीएसटी बचत उत्सव रा बारा मांय खबरनवीसां सागे बातचीत कर रही ही। वित्त मंत्री कह्यो के जीएसटी री रेट मांय कमी रो फायदो जनता ताई पूग रह्यो है।

ई मौके सूचना अर प्रसारण मंत्री अश्विनी वैष्णव कह्यो के ई साल नौरता मांय रिर्कोर्ड बिक्री व्ही। वे कह्यो के लारला नौरता रे मुकाबले ई साल नौरता मांय इलेक्ट्रॉनिक सामान री बिक्री मांय 25 फीसदी री बधोतरी व्ही। वे कह्यो के जीएसटी सुधारों रे कारण खाण-पीण री चीजां रा मोल मांय कमी व्हे रही है।

जीएसटी बचत उत्सव रे मौके वाणिज्य अर उद्योग मंत्री पीयूष गोयल कह्यो के नौरता रे दौरान मोटरगाड़ियां री बिक्री मांय तेजी आयी अर इलेक्ट्रॉनिक सामान री बिक्री लारला सगळा रिर्कोर्ड तोड़ दीना। वे कह्यो के दुनिया री माली अस्थिरता बीचे देश री विकास दर इतरी मजबूत है के अंतर्राष्ट्रीय मुद्रा कोष ने ई भारत री विकास दर रा अनुमान ने बदल र 6 दशमलव 6 फीसदी करणो पड़्यो।

000

मुख्यमंत्री भजन लाल शर्मा काश्तकारां रा मान ने सब के मोटो मान बतायो है। वे आज भरतपुर मांय राख्यी ज्या किसान सम्मेलन मांय बोल रह्या हा। श्री शर्मा कह्यो के किसान रे विकसित व्हेवण के देश अर प्रदेश आप के आप विकसित बण जावेला। मुख्यमंत्री प्रदेश रा करीब 72 लाख किसानां रा खाता मांय मुख्यमंत्री किसान सम्मान निधि री चौथी किश्त रा तौर के 718 करोड़ रुपया के बत्ती रकम किसानां रा खातां मांय डीबीटी रे जरिये भेज्यी। मुख्यमंत्री कह्यो के सरकार किसानां ने मजबूत बणावण सारू काम कर रही है।

.....

मुख्यमंत्री कह्यो के केन्द्र कानी ऊँ किसानां सारु चलायी ज्यी धन-धान्य योजना ऊँ प्रदेश रा आठ जिला ई जोड़ी ज्यो है। वे कह्यो के किसानां री उपज बधावण सागे उपज रो मोल बधावण सारु सरकार छोटी-छोटी साखां ने ई उचित मोल दिरावण रो काम कर रही है। मुख्यमंत्री कह्यो के सरकार गोपालक क्रेडिट कार्ड योजना ऊँ किसान क्रेडिट कार्ड ने जोड़्या है। मुख्यमंत्री इण ऊँ पैली नदबई मांय 55 करोड रुपया रा खर्च ऊँ बणाया जावण वाळा जिला अस्पताल रा काम री नींव ई रखी। ई मौके सहकारिता मंत्री गौतम कुमार दक, जल संसाधन मंत्री सुरेश रावत अर गृह राज्य मंत्री जवाहर सिंह बेदम समेत केई विधायक मौजूद रह्या। श्री शर्मा वां रा गांव अटारी मांय राख्यी ज्यो कार्यक्रमां मांय ई शामिल व्ह्या। प्रदेश रा सगळा जिला ई मुख्यमंत्री रा कार्यक्रम ऊँ वर्चुअली तरीका ऊँ जुड़्या। पाली मांय राख्यी ज्यो कार्यक्रम मांय पशुपालन मंत्री जोगाराम कुमावत कह्यो के सरकार किसानां अर गरीबां रो भलो करणो तैय कीनो है। सवाईमाधोपुर मांय व्ह्या कार्यक्रम रे दौरान राज्य स्तर रा कार्यक्रम रो सीधो प्रसारण ब्लॉक अर ग्राम पंचायत लेवल माथे ई करी ज्यो जिण मांय मोटी तादाद मांय किसान अर जनता भाग लीनो। बाड़मेर मांय राख्यी ज्यो जिला स्तर रा कार्यक्रम मांय मुख्यमंत्री ई रो फायदो लेवण वाळा किसानां सागे बातचीत ई कीनी। डीग जिला रा किसानां रा खातां मांय 10 करोड 39 लाख रुपया ऊँ बत्ती रकम भेजी ज्यी।

000

जयपुर जिला मांय ग्राम पंचायतवार लगाया जा रह्या किसान रजिस्ट्री शिविरां मांय हाल ताई 2 लाख 76 हजार ऊँ बत्ता किसानां ने 11 अंकां री विशिष्ट पहचान संख्या दीरीजी है। अतिरिक्त जिला कलेक्टर देवेन्द्र कुमार जैन बतायो के जयपुर प्रदेश मांय सब ऊँ बत्ती किसान आईडी जारी करण वाळो जिलो बण ग्यो है। जयपुर जिला मांय प्रधानमंत्री किसान सम्मान निधि योजना रो फायदो लेवण वाळा मांय ऊँ हाल ताई 79 फीसदी ऊँ बत्ता किसान रजिस्ट्री शिविरां सारु नाम मंडा लीना है।

000

बारां जिला री अंता विधानसभा सीट माथे उपचुनाव सारु भारतीय जनता पार्टी रा उम्मीदवार मोरपाल सुमन आज पर्चा दाखिल कीनो। ई दौरान वां सागे सांसद दुष्यंत सिंह, विधायक राधेश्याम बैरवा, ललित मीणा, पैली वाळा विधायक नरेंद्र नागर अर भाजपा रा केई ओहदादार मौजूद रह्या। रिटर्निंग अधिकारी रे मुजब उप चुनाव सारु हाल ताई 12 जणा 17 पर्चा दाखिल कीना है। नामपाना 21 अक्टूबर ताई दाखिल कर्या जा सकेला। 23 अक्टूबर ने पर्चा री जांच करी जावेला, अर 27 अक्टूबर ताई नाम पाछा लिया जा सकेला। 11 नवम्बर ने वोट पड़ेला जद के 14 नवम्बर ने वोट री गिणती करी जावेला। ई बीचे निर्वाचन आयोग उपचुनाव रे दिन सगळा कर्मचारियां सारु तनखाह सहित छुट्टी रो ऐलाण कीनो है। आयोग रे मुजब वोट देवण वाळा जो लोग दूजी ठौड़ा ऊँ वोट देवण सारु आवेला वां ने ई ओ सुबीतो मिलेला।

000

आज धनतेरस सागे दीवाळी रो त्यौहार सरु व्ह्यो। ई मौके सोना-चांदी रा सिक्का, जेवर, बर्तन, इलेक्ट्रॉनिक सामान, सजावटी चीजां अर वाहनां री खरीदी सारु मांटी तादाद मांय ग्राहक बाजारां मांय पूग रह्या है। जयपुर रा बाजारां मांय खरीददारां री मोटी तादाद ने ध्यान राखता थकां बाजारां अर परकोटा हलका मांय आवण-जावण री खास व्यवस्था करी ज्यी है। सवाईमाधोपुर मांय ई आज धन तेरस रे मौके बाजारां मांय मोटी तादाद मांय खरीददार पूग रह्या है। लोग मिन्दरां मांय दीया जोबा सारु पूग रह्या है। सरहदी जिला जैसलमेर रा लक्ष्मीनाथ मिन्दर अर सोनार किला माथे रा मिन्दर मांय ई मोटी तादाद मांय जातरु पूग रह्या है। उदयपुर मांय जगदीश मिन्दर समेत न्यारा-न्यारा मिन्दरां मांय सोहवणी सजावट करी ज्यी है। म्हाणा खबरनवीस बतायो के दीपदान सारु मोटी तादाद मांय जातरु पूग रह्या है।

.....

दीवाळी रे मौके पूरा राज्य मांय मिन्दरां, बाजारां, चौराहां, खास इमारतां अर स्मारकां ने रंग-बिरंगी रोशनी ऊँ सजायी ज्यो है। खास बाजारां मांय भारी यातायात माथे रोक लगायी ज्यी है। आज

धनवन्तरी जयंती ई मनायी जा रही है। ई मौके आयुर्वेद औषधालयां मांय भगवान धनवन्तरी री पूजा—अर्चना करी ज्यी। पाली रा बांगड़ अस्पताल परिसर मांय धनवन्तरी पूजन सागे संगोष्ठी राख्यी ज्यी। दीवाळी रा पांच दिन रा त्यौहार, ज्यो ई साल ई 6 दिन ताई मनायो जावेला, रा दूजा दिन काल रूप चौदस मनाई जावेला।

000

भीलवाड़ा ज़िला मांय आदि कर्मयोगी अभियान रा तैत आदिवासियां रा कल्याण रा सराहवणा लायक कामां सारू जनजातीय कार्य मंत्रालय जिला कलेक्टर जसमीत सिंह संधू रो मान कीनो है। राष्ट्रपति द्रौपदी मुर्मू संधू ने ओ मान दीनो। ज़िला मांय आदिवासी समुदायां रा विकास अर वां ने मज़बूत बणावण सारू शिक्षा, स्वास्थ्य अर माली मज़बूती रा हलका मांय खास काम करी ज्यो। ई मौके जनजातीय कार्य मंत्रालय रा सचिव विभु नायर कह्यो के भीलवाड़ा ज़िला रो ओ मान आदिवासी कल्याण अर वां ने मज़बूत बणावण रा हलका मांय बेहतरीन काम रो प्रतीक है। मान लियां पाछे भीलवाड़ा रा कलेक्टर जसमीत सिंह संधू कह्यो के ओ मान ज़िला रा अहलकारां अर कर्मचारियां री मेहनत रो नतीजो है।

000

भरतपुर ज़िला रा नदबई मांय लुहासा गांव कने आज एक कार री फेंट मांय आ जावण ऊँ मोटरसाइकिल सवार एक ही पिरवार रा चार जणा री मौके ई मौत व्हे ग्यी। ज़िला रा रुदावल मांय भाटा ऊँ भर्या ट्रेलर री फेंट मांय आ जावण ऊँ मोटरसाइकिल सवार एक महिला री मौके ई मौत व्हे ग्यी। हादसा पाछे रीस्योड़ा लोग बस स्टैंड माथे जाम लगा दीनो अर ट्रेलर मांय तोड़—फोड़ कीनी। ट्रेलर चलावण वाळो मौका ऊँ फरार व्हे ग्यो जिण ने पुलिस हेर रही है।

000

चूरू मांय पुलिस तीन करोड़ रुपया रा नकली नोट अर एक लाख 86 हजार रुपया री नकदी सागे सात जणां ने गिरफ्तार कीना है। आरोपित लोग चुरा रा एक जणा ने 5 हजार रे बदले 10 लाख रुपया देवण री बात कीनी ही। पुलिस पकड़ी ज्यो लोगां रा कब्जा ऊँ नकली नोटां री गड्डियां बणावण री मशीन, दूजी सामग्री अर दो कारां बरामद कीनी है।

000